



SIARAN MEDIA KEMENTERIAN PERTANIAN DAN KETERJAMINAN MAKANAN

KUNJUNGAN HORMAT DARIPADA TYT MUHAMMETNYAZ MASHALOV, DUTA BESAR TURKMENISTAN KE MALAYSIA KE ATAS YB MENTERI PERTANIAN DAN KETERJAMINAN MAKANAN

PUTRAJAYA, 3 APRIL 2026 – YB Datuk Seri Haji Mohamad bin Sabu, Menteri Pertanian dan Keterjaminan Makanan telah menerima kunjungan hormat daripada TYT Muhammetnyaz Mashalov, Duta Besar Turkmenistan ke Malaysia. Pertemuan julung kali ini memberi ruang kepada kedua-dua pihak untuk meneroka potensi kerjasama dalam sektor pertanian dan keterjaminan makanan, selain memperkukuh hubungan perdagangan sedia ada.

Rekod perdagangan pertanian antara Malaysia dan Turkmenistan sehingga Disember 2025 mencatatkan nilai sebanyak RM 58.74 juta, yang merangkumi eksport produk pertanian Malaysia seperti kopi, koko, teh dan rempah-ratus. Sehubungan itu, kedua-dua negara bersetuju untuk bekerjasama bagi meneroka lebih banyak peluang pasaran bagi produk pertanian tempatan, sekaligus meningkatkan perdagangan dua hala untuk manfaat bersama.

Fokus utama perbincangan merangkumi kerjasama strategik dalam pengurusan sumber air pertanian, penyelidikan dan pembangunan (R&D) melalui kerjasama institusi pertanian, serta pemodenan sektor pertanian secara menyeluruh bagi menangani impak perubahan iklim dan sebagai langkah proaktif bagi memperkasakan agenda keterjaminan makanan di peringkat global.

Dalam pertemuan tersebut, YB Menteri turut menyampaikan jemputan kepada Turkmenistan untuk menyertai Malaysia Agriculture, Horticulture and Agrotourism Show (MAHA) 2026 yang akan berlangsung dari 28 Ogos hingga 6 September 2026 di MAEPS, Serdang, bertemakan “Penciptaan Nilai Demi Keterjaminan Makanan”. Turut hadir dalam sesi kunjungan hormat tersebut adalah pegawai-pegawai kanan KPKM.

Dikeluarkan oleh:

KEMENTERIAN PERTANIAN DAN KETERJAMINAN MAKANAN

